

Segunda carta del apóstol San Pablo a Timoteo

Pablo escribe a Timoteo

1 ¹As Pábloat bah acu ayin carit uch cuihsuro. Bah Timoteo acu ayin cuihsuro. Asan Sir ajc cutar Jesucristo chihtá ehcúquibro. Isat Jesucristo chihtá cácyat isan Sir jor itin wajacro. ²Timotéou, bahra as acura wacján wanro. Aját bah sehnacro. Sirat Tetát cat, Cara Jesucrístoat cat bah sehnác etar aját bah cuitar conro. Bah obir yajcayta acu bah cuécuti acu bah ohbac ítayta acu conro.

Dando testimonio de Cristo

³Aját Sir quin bah cuitar conro. Ricar cat cheycar cat bah cuitar conro. Bahat Sir chihtá ay cajac etar Sir quin “oquéy,” wacaro. As cohtinát Sir tamo sihw̄ar eyta aját cat eyta séhw̄aro. Asan Sir ub cahmar bitara séhw̄ata bintara aját eyta séhw̄aro. ⁴Aját bah tamo séhw̄atan, bahan as racar ojocro. Eyta séhw̄ar bah tihra rácatro. As bah owár tíhryatan, as ahní rehcatáro. ⁵Aját ítitan, bahat Sir tamoan urá istaná cuitar séhw̄aro. Récaji behmá cac Loidat urá istaná cuitar eyta séhw̄ajacro. Bah ab Euníceat cat eyta séhw̄ajacro. Ahra aját ítitan, bahat cat eyta séhw̄aro. ⁶Eyta cuácayt aját bah quin wacaro. Aját récaram bah cuis otar ajmár atcar chájacro. Eyta chácayt bah quin Sirat im urán ajcan wíjacro. Eyta wijac etar acsar sinwi. ⁷Sirat is ayú rehquín acui urá wítiro. Eyta cuat is urán ajcan cuít rehcayta acu cat, cahujín sehnác chácayta acu cat, urá bár ítiti acu cat wíjacro.

⁸Eyta bijira bah ayú rehti jaw̄i. Jesús chihtá rooti cuar ehcuwi. Asan Jesús chihtá ehcwayat ques icar cárcel icar tunjacro. Eyta cuar bahat uw cac cahmar as ajcá bár chati jaw̄i. As ruhw̄úr eyta, úwatan bah cat eyta ruhw̄ata óraro. Eyta cuar ayú rehti jaw̄i. Cuatán Sir chihtá ehcuwi. Sirat im chihtá ehcún acu bah quin urán cuít wícatáro. Etar ey chihtá ehcuwi. ⁹Sirat is cuitar wajacro. Is

sújacro. Ima uwa chaquin cájacro. Isan urá ay chaquin cájacro. Isat ur ay yajác étari cátiro. Cuatán ima urá cuitar cájacro. Jesucrísatoat isat Sir tayar yajác ques is cuécuti cuar sújacro. Anto cajcan ican chati cuácayat, Jesucrísatoat is siwin acu waquíur chájacro. ¹⁰Uchicri cuat echí siwin wajác etar ahra Jesucrismo cajc uch cuitar wijacro. Wiquitrun uw sújacro. Jesusan uwat Sir tayar yajaquey tunin acu chinjacro. Etar býinat ey chihtá rahcyat sutá báreyra. Cuat Jesús chihtá cut uw cuacúr Sir jor bur cut suw cut ohbac itay beyáyqueyra. ¹¹Chihtá ey beyin acu, siw̄ in acu, ehcún acu as cájacro. ¹²Ajatán ey chihtá ehcúc ques, ey chihtá siw̄ ic ques, uwat as ruhw̄uro. Ruhw̄ ú cuar, as ayú réhtiro. Cuatán ajatán bi tamo séhw̄actara, eyan ajatán itro. Jesucrismo eyan eyro. Aját ey ojcor conro. As ajc síwayta acu conro. Aját ítitan, eyat as obir yajcaro. Aját ey chihtá ehcwáyatan as obir yajcaro. Cabar tinyat cat im eyta obir yajcáyqueyra.

¹³Aját bah quin ehcuájqueyan caba ehcujacro. Eyta cuácayat bahat cat tehmoti siw̄ i. Jesucrismo tamo sehwar ey siw̄ i. Jesucrismo sehnác chaca rabar ey siw̄ i. ¹⁴Sirat bah ur icar chihtá wijac ey tehmoti jaw̄ i. Chihtá tehmoti acu Sir Ajcan Cámuran Eyat bah cuitar yajcáyqueyra. Im Ajcan Cámuran Ey Sirat is ur icar chájacro.

¹⁵Bahat ítitan, Jesucrismo chiwa Asia cajc cut bin bahnáquinat as istir yehw̄ te bahjacro. Serin Figelo cat, Hermógenes cat asi jor bin ahra as ajcá bár bahjacro. Eyta bahjacan bahat cat itro. ¹⁶Cuat Onesíforoat as obir yajacro. As wahitay wijacro. Onesíforo cuitar cat ey owár itquin cuitar cat conro, Sirat eyin obir yajcayta acu. As cárcel icar tunjác cuar, Onesíforoat rooti cuar as obir yajacro. ¹⁷Cuat eya usár Roma pueblo wiquír, as bístartara úrojocro. As istíc oceso tas úrojocro. Istír car as obir yajacro. ¹⁸Eyta bira aját ey cuitar Sir ojcor conro. Cabar týnatan Sirat ey síwayta acu conro. Ey ruhw̄uti obir yajcayta acu conro. Bahat itit cat, aját itit cat, eyat Efeso pueblo cuitar as cuitar ay yajacro.

Un buen soldado de Jesucrismo

2 ¹Wacjú, bahra urán cuít chaw̄ i. Jesucrísatoat bah sehnác rehcyat urá wíjacro. Eyta wíjaquey cuitar acsar cat cuít sinwi. ²Aját bah cucáj acat, owár bin cucáj acat chihtá ehcuájqueyan bahat cahujín quino cat ehcuwi. Acsar cat im eyta tehmoti ehcwata bin quino ehcuwi.

³Bahan Jesucrismo ajc cutaran siw̄quib yehnjacro. Eyta bijira uwat bah ruhw̄ata cuar, Sir chihtá ehcún acu tan uw̄ i. ⁴Síratan bah quin bi yajc áyictara, bahatán chiht istiy séhw̄ati cuar eyta yajw̄ i. Bah cat soldádoin eyta chaw̄ i. Soldádoinat imár cara chihtá cuitar wácati yajquíur eyta bahat cat eyta wácati yajw̄ i. Eyta yajcayat, Siran ahní rehcyáyqueyra. ⁵Sir chihtá ehcwayat cat im eyta tehmoti ehcuwi. Bahat cat cuéhsuquinat yajquíur eyta yajw̄ i. Cuéhsuquinat cahujín burbar yajquín acu cuehsíc chihtá chajac cuitar cuehsro. Cuéhsuquinat yajquíur eyta bahat cat bitara yajcata bántara eyta yajw̄ i. Sir chihtá bitara ehcwata bántara eyta ehcuwi. Ehcwata bin ehcutieyra ¿Sirat behmá técuajaqui? ⁶Sir chihtá ehcwáy yehnyat cat ohca sinti ehcuwi. Chiy cáquinat yajquíc ojcor

séhwāwi. Chiy cáquinat ira racar reht ohca sinti yajquí eyta, bahat cat Sir chihotá eyta ohca sinti ehcuwi. Ohca sinti ehcwayat, Síratan bah acuan yarsa túnayqueyra. ⁷Aját waquey tamo séhwāwi. Eyta séhwāyat, Sirat urán bowān cuít wícaqueyra. As chihotá bahnác orac rahcuayta acu urá wícaqueyra.

⁸Jesucristo tamo bahan tan chinti séhwāwi. Jesusan chinjác cuar sicor estají yehnjaquey tamo séhwāwi. David bomcar Jesús tamo séhwāwi. Ey chihótan ayro. Aját uw quin ey chihotá siw̄ro. ⁹Ey chihotá ehcúc ques icar, uwat as ruh̄w̄uro. As cárcel icar tunjacro. Besin tunír eyta, as catum eyta tunjacro. As cárcel icar eyta tunjác cuaquir, cahujinat Sir chihotá acsar im eyta ehcuro. ¹⁰As ruh̄w̄ú cuar, as conti tan úcaro. Cahujín Sir uw yinata eyin racar reht as tan úcaro. Eyinat Jesucristo tamo síhwāyta acu Sir chihotá wácati yajcaro. Jesucristo tamo síhwāyatan, éyinan síwayqueyra. Jesucrístoat eyin síuyat, éyinan Sir jor cuacúr bur cut suw cut ítayqueyra. Sir jor eyin cat carin yináyqueyra. Eyta cuácayat úwatan eyin tamo Sir sasá síhwāyqueyra. Eyta chihotara aját Sir chihotá wácati yajcaro.

¹¹Uwat wáqueyan uní wacaro: Is cat Jesucristo chihotá ques sácayatan, is cat ey jor cuacúr ítayqueyra. ¹²Uwat is ruh̄w̄ú cuar, isat Jesús chihotá wácati tan úcayat, is cat ey jor carin yináyqueyra. Cuatán isat “Jesucristo is acu cárai batro,” wacayat, eyat cat “Eyinra as uwi batro,” wacáyqueyra. ¹³Isatan Jesucristo tamo séhwāti wacac tacat, Jesucrístoat im eyta tehmoti ay yajcaro. Eyatan uw cayar yajca báreyra.

Un trabajador aprobado

¹⁴Bahat síwāta bin quino bucoy bucoy ehcuwi. Sir ub cahmar bahat ajc uní cuitar uchta waw̄i: “Chihotá ajquí chihotá ajquí ques icar rahra rahra wayú sácati jaw̄i,” waw̄i. Wayúqueyra icúr acui batro. Eyta wayúyeyra, ¿uwat rahra rahra ur ay bár yájcajaqui? ¿Eyta wayú rahquéyinatra Sir chihotá waca téjequi? ¹⁵Sir ub cahmar ay jaquin acu behmá cuitatrun ay yajw̄i. Eyta yajcayat bah cahujín cahmar ayú rehti chácayqueyra. Sir chihotá cat tehmoti ehcwáyqueyra. ¹⁶Cuayir tew̄yat rahcti jaw̄i. Uwat ey ráhcyeyra, Sir chihotá bar waca téyqueyra. Acsar acsar ur ay baran cuít yajcáyqueyra. ¹⁷Cuayir tew̄ic rahcuír cuitar awan uw urá bar tehmotaro. Semar semar ur ay bár icar áyataro. Serin Himenéoin chihotá, Filétoin chihotá cuitar uwan ur ay bár icar ayro. ¹⁸Himenéoin Filétoin éyinat Sir chihotá bar tehmojocro. Sir chihotá tehmór éyinat wacaro: “Uw sácajaquin sicor estají yiníc cab bar chac bahjacro,” wacaro. Eyta waca rabar cuayir tew̄ro. Eyta tew̄yat chiwa cahujinat ey rahcro. Eyta tew̄quey rahcuír car éyinat Sir chihótan waca bahcaro. ¹⁹Cuatán Sir imát wájáqueyrún téhmojotro. Sir chihotá im eyta rehcaro. Chihotá úchtaro: “Uw bíyinatán Sir tamo síhwāctara, Sir imatan éyinan itro.” Uch cat Sir chihotaró: “Bíyinatán ‘isan Jesucristo chíwaro,’ wacáyatan, éyinatán ur ay bár yajquíc etátaro.”

²⁰Sir chiwa bitara chácata tara sinin acu uch síhwāwi. Carin usar soya tamo síhwāwi. Carin usar oro toca cat chero. Yera ruca cat chero. Tabir

ruca cat chero. Baycúr cat chero. Oro toca sar carin quin ira wícaro. Cuatán baycúr sar rurúm chácáro. Sir chiwa cat éytaan wanro. Chiwa ricán cuántiro. Chiwa cahujín eyin quin Sir ima chihtá siw̃ ayro. Cuatán cahujín quínora canar eta cuti bi yajc ayro. ²¹Chiwa ima ur icar ur ay bár bi bahnác etyat, bes yajti ityat, tecuas sinti ityat, Sir chihtá ay rahcyat, Sirat eyin quino canar ayan cuít bi yajc ayro. Cahujinat chihtá ay yájcajar eyan eyin quino yajc ayro. Sirat eyin quin bi yajc áyictara, éyinat caba yajcátaro.

²²Eyta cuácayat síbijinat ur ay bár yajca raca isór eyta bahra eyta yajca racar isoti jaw̃i. Cuatán bahatra Sir tayar yajti, urá chi ítuwi. Sir tamo cat séh̃wawi. Uw catum sehnác chaw̃i. Tecuas cat tecuas yajti jaw̃i. Bíyinat ur istaná cuitar Sir ojcor conyat, éyinan eyta itro. Eyin itir eyta bah cat eyta ítuwi. ²³Cuayir tew̃quin owár wayuti jaw̃i. Uwat cuayir tew̃ay yinyat bahatra eyin ria cati jaw̃i. Eyin owár wayúyeyra, ¿rahra rahra tecuay yínajaqui? ²⁴Sir chiwa, Cara chiwa uw owár rahra rahra tecuan acui batro. Cuatán bahnaquin ajcá ji beyátaro. Uw cat caba síw̃ataro. Uw cat técuati síw̃ataro. ²⁵Eyat ima quehsuquin acu turti cuaran ajc uní cuitar síw̃ataro. Turti cuaran ajc uní cuitar siw̃yat quehsuquin imár ur ay bár tehmeta óraro. Sir ajc cut tehmeta óraro. Ur ay bár tehmóyatra Sir tamo síh̃wataro. Chihtán ay bi yajcátaro. ²⁶Eyta tehmóyatra, Sir chihtá cácyaytra, Sisrá m ohnor síwayqueyra. Récam Sisramat eyin cájaquinro. Ima chihtá yajc ayin acu cájaquinro. Eyta cajac cuar, bahat eyin quínoan turti cuar ajc uní cuitar wacayat, éyinat Sisrá m chihtá eti teta óraro.

Cómo será la gente en los últimos días

3 ¹Uch rahcwi. Cabar tina cab cu racayat uw bitara útara cuácayqueyra. ²Uwat cahujín tamo síh̃wati cuar imár támoa síh̃wayqueyra. Ray racar, ira racar, oya racar isóyqueyra. Imaran bahnaquin cuít wacáyqueyra. Imaran cahujín cuít síh̃wayqueyra. Cahujín quino ajc ahsín tew̃áyqueyra. Imár tetín, abín quehsúr cat ajcá bár chácayqueyra. Cahujinat uw acu ay yajc tacat, ráhrara ruh̃áyqueyra. Ay yajác síh̃wá báreyra. Cabar bar tina cab cu racayat uwat Sir tamo cat síh̃wati chácayqueyra. ³Cahujín cat ajcá bár beyáyqueyra. Cahujín cat etiti ruh̃áyqueyra. Cahujín cat ríoyqueyra. Ur ay bár icar áyayqueyra. Síh̃wati cuar uw ruh̃áyqueyra. Urá ay eyin quehswáyqueyra. ⁴Iw̃oquin cayar yajcáyqueyra. Ay síh̃wati urá bár ítayqueyra. Imaran ayan cuít síh̃wá sácayqueyra. Imaran ahní rehquín acu bitar utar ahsín yajcáyqueyra. Cuat Sir tamora síh̃wá báreyra. ⁵Eyinat uw ubot “Aját Sir tamo séh̃wáro,” wacáyqueyra. Eyta waquíc cuar ey chihtá cuitar yájtiro. Eyta bira, bahat uw eyta bin owár ténati jaw̃i. ⁶Uw eyta binra cahujín usar rauwir itro. Eyta rauwir ima chihtá wiw̃ín quino síw̃ro. Wiw̃ín eyin urá batro. Wiw̃ín eyin imarat ur ay bár yajác tamo síh̃wac rehquít urá cuácáro. Eyta rehquít icuran biyan bahnác ur ay bár yajca racar isoro. ⁷Icúr bi chihtá tew̃iquey sinay yinro. Eyta cuar chihtá sínata bi ey síntiro. ⁸Récam cuiquin Jánésat cat, Jámbrésat cat Moisés ajcá bár chájacro. Jánésat cat, Jámbrésat cat Moisés ajcá bár chaquir eyta, aha cat uw ur ay bár binat chihtá uní queney ajcá bár bécaro. Uw

eyin urá batro. Sir tamo seh̄w̄ac waquíc cuar, eyta cat batro. ⁹Eyta cuar eyta tew̄ ic éyinat cahujín bitách cayar yájcajatro. Eyin urá bár tew̄ ican cahujinat istátaro. Récaran Janes cat, Jambres cat urá bár tew̄ ic uwat istír eyta, ah cat eyta istátaro.

El último encargo de Pablo a Timoteo

¹⁰Timotéou, aját síw̄ jacan bahatán itro. As bitara ítictara bahatán itro. As urán bitáratara itro. Aját Sir tamo séh̄w̄acan itro. Cahujinat ruh̄wayat asa turti ítchacan bahatán itro. Aját uw cahujín sehnacan itro. Sir chih̄tá wácati tan ujac itro. ¹¹Uwat as ruh̄w̄ ú yeh̄w̄ jacan itro. As cuac yarjacan itro. Antioquía pueblo cuitar, Iconio pueblo cuitar, Listra pueblo cuitar as ruh̄w̄ ú yeh̄w̄ jacro. Eyta cuar uwat as ruh̄w̄uyat, Sirat as síujacro. Asan bitar utar cuajac cuar Sirat as síujacro. Bahatán eyta itro. ¹²Eyta cat isat ítitan, bíyinan Jesucristo chih̄tá cuitar it cun reh̄cáyatan, éyinan uwat ruh̄w̄ áyqueyra. ¹³Cuatán ur ay bár éyinatán acsar ur ay baran cuít yajcáy yináyqueyra. Sucuar ahsinan cuít tew̄ay yináyqueyra. Eyinat uwan cuít cayar yajcáyqueyra. Eyta cat imarwan cayar yajcáyqueyra.

¹⁴Cuatán bah úrara eyta chati jaw̄ i. Urá bitara binat bah quin Sir chih̄tá síw̄ jactara, bahatán itro. Eyta bira chih̄tá sínjaqueyra wácati jaw̄ i. Chih̄tá ay cajac teh̄moti jaw̄ i. ¹⁵Bahatán sasár echí cuar, ah biht ocso tas Sir carit ayan cuít bi sinay raújacro. Sir carit cuitar, urán bow̄an cuít yehnátaro. Ey cuitar Jesucristo tamo seh̄w̄ay yehnátaro. Ey tamo séh̄w̄ayat, Sirat bah síwayqueyra. ¹⁶Carit eyan bahnacan Sirat ima camur cuit cuihsú áyjacro. Eyta cuácayat, carit eyan cuitar uw quin síw̄ataro. Uw quin ajc uní cuitar yarsa wacátaro. Uw quin ay bár yajquíc et yarsa áyataro. Uw quin ay it áyataro, carit ey cuitar. ¹⁷Ey cuitar eyta yajcayat, Sir sasát bitar utar ur ay yajquíc sínataro.


4 ¹Aját bah quin wacaro. Sir cac cahmar, Jesucristo cac cahmar bah quínoan uchta wacaro. Jesucristo eyat uw urá wahitáyqueyra. Uw sácajaquin urá cat, estají bin urá cat wahitáyqueyra. Jesucristoat eyta istír catrun, ey ques cuécwayqueyra. Cahujín cuitatra wacáyqueyra. Jesucristo sicor cajc uch cuitar eyta yajcáy wicáyqueyra. Cara yehnáyqueyra. Eyta etar aját bah quin uchta yajc ayro. ²Sir chih̄tá uw quin ehcuwi. Bahatán chati siw̄ i. Uwat rahcuíc cun tacat rahcuíc cun bár tacat im eyta bahnác ehcuwi. Eyta ehcwá rabar ay yajcayta acu tew̄ i. Ay bár yajcayat cat ajc uní cuitar waw̄ i. Eyta waquí car ay it aywi. Eyta ehcwá rabaran, waca rabaran turti siw̄ i. ³Itchareht yájcajareht chih̄tá uní bi siw̄yat, uwat rahcuí cun bár reh̄cáyqueyra. Rahcti cuar imarat icúr yajca racar isóctara eyta yajcáyqueyra. Eyta reh̄quí bíyinatán “icuran biyan yaj cuntar eyta yajw̄ i,” wáqueyinan uwat imár siw̄quin cácyqueyra. ⁴Eyta caquir Sir chih̄tá uní eyra bar waca téyqueyra. Waca ter car, ruiyin chauwa rahcuay yináyqueyra. ⁵Eyta bijira bahra wácatian urá ji ítuiwi. Sir chih̄tá ehcwayat ques icar uwat bah ruh̄w̄úc tacat ehcún acu tan uw̄ i. Acsar acsar uw istiy quin, istiy quin Sir chih̄tá ay bi ehcuwi. Sirat bah quin yajc áyjacan bahnacan yarsa yajw̄ i. Teh̄moti yajw̄ i.

⁶Ahra aját Sir sehnác etar uwat as yauwin wacaro. Ahra asra chiníc cab cu rajacro. Sirat as cuacúr bequic cab cu rajacro. ⁷Sirat as quin yajc áyjacan,

aját ur istanác cuitar bahnác caba yaje tihrajacro. Sir chihtá aját bahnacan yarsa wácati tehmoti yajacro. ⁸Eyta cuácayat ahra Sirat as quin ayan cuít bi wiquin acu yaje chájacro. As cuquic cahmor yaje chájacro. Ima chihtá ay yajaquin quin wícata ey wícayqueyra. Sirat uw urá wahítqueyat as quin wícayqueyra. Jesucristo sicor cajc uch cutar wicayat, eyta wícayqueyra. As istir quínoi wítiro. Cahujín quino cat eyta wícayqueyra. Bíyinan Jesús sehná reht ey wic acor ítyatan, eyin quino cat eyta wícayqueyra.

Instrucciones personales

⁹As quin in rawí. Behmá cuitatrun rawí. ¹⁰Demas Tesalónica pueblo bijacro. Ur ay bár binat yajquír eyta Démasat cat eyta yajca racar rehquít as istir yehw̃ te bahjacro. Crescentein cat Galacia cajc cut Sir chihtá ehcwáy bijacro. Tito cat Dalmacia cajc cut ehcwáy bijacro. ¹¹Eyin bey yíroran, as owaran Lúcasan étanro. Eyta cuácayat, bah in rawí. Raquín yehnyat, Marcos cat bahti yehw̃ rowí. Márcosat as cuitar yajcáyqueyra, Sir chihtá ehcún acu. Eyta bira Marcos yehw̃ rowí. ¹²Tíquicoan cat usari batro. Aját ey Efeso pueblo cun áyjacro. ¹³Bah racayat as siricajá cat rowí. As siricajá erar Carpoin usi bahjacro. Troas pueblo cuitar bahjacro. Carit cat erar báhjacro. Carit buror chac bahjaquey bahti yehw̃ rowí. Umá órojoc carit buror chac bahjaquey cat tan chinti rowí.



(2 Timoteo 4.9)

¹⁴Yera óroquib Alejándroatan asan cuít ruhw̃ujacro. Alejándroat as ruhw̃ú tayar ques Sir imát cuécwayqueyra. ¹⁵Isat chihotá ehcwayat, Alejándroat quehsujacro. Bah cat ey cahmar yají ítuwi. ¿Behmá cat rúhw̃ajaqui?

¹⁶Carin cac cahmar cajc uch cutar ajmarát bitar yajáctara ehcujacro. Récaji aját eyin cac cahmar tew̃yat rehratí as cuitar icuri wátiro. Bahnáquinat as cuitar wati cuar as istir cham báhjacro. Istir cham báhjaqui ques icar Sirat cuécuti acu conro. ¹⁷Cuat Cara Jesucrístroat as jor etiti chájacro. As jor etiti chaquir urán to wíjacro. Ima chihotá tew̃ayta acu wíjacro. Judío bár bin bahnáquinat Jesús chihotá rahcuayta acu as quin urá wíjacro. Jesucristo as jor cuácayat uwat as bar yauwata cuat, eyat as síujacro. ¹⁸Eyta cuácayat aját ítitan, uwat bitara útara as cuaquin yehnyat, Cara Jesucrístroat as bar síwatáro. Eyat síwayat, as icrati cuaca báreyra. Ey jor cuacúr itay beyin acu as síwayqueyra. Iman cara rehquey cutar itay beyin acu síwayqueyra. Uwat ey tamo ayan cuít síhw̃awi. Ey ojcor ay waw̃í. Bur cut suw cut eyta waw̃í. Amén

Saludos y bendición final

¹⁹Aját Priscain tamo, Aquílain tamo séhw̃aro. Eyin quino eyta waw̃í. Onesíforoin tamo cat séhw̃aro. Eyin quin eyta waw̃í. ²⁰Erástóan Corinto pueblo cuitar bahjacro. Trófimora yar rehjecro. Eyta yaric etar aját Mileto pueblo cuitar tan jaquin acu cham bahjacro. ²¹Anto barai rauti cuat owár echí raw̃í. ¿Riwat séroat behmár túnajaqui? Eubúloat cat, Pudenteat cat, Linoat cat, Claudiat cat, chiwa bahnáquinat cat bah tamo síhw̃ac wac ayro. ²²Aját bah cuitar Sir ojcor conro. Bah urá wícayta acu conro. Sirat bah racar reht obir yajcayta acu conro.